

**Perubahan Melalui Evolusi Bukannya Revolusi - PM
mStar Online
Jun 09, 2012
Oleh TEH ENG HOCK**

SHAH ALAM: Perubahan yang dilakukan melalui evolusi berbanding revolusi akan menyumbang kepada transformasi yang lebih positif untuk negara, kata Perdana Menteri Datuk Seri Najib Tun Razak.

Beliau berkata, Malaysia berkembang menjadi sebuah negara berjaya sejak ia mencapai kemerdekaan 55 tahun yang lalu.

"Malaysia berkembang daripada sebuah negara miskin dan kecil. Kita tidak yakin, tidak optimis dan tidak pasti sama ada boleh berjaya sebagai sebuah negara. Ramai meragui kita.

"Namun pada hari ini, tiada siapa boleh menafikan kejayaan Malaysia," katanya.

Dalam ucapannya pada majlis perasmian Perhimpunan Belia 4B Malaysia, beliau menjadikan Mesir sebagai contoh bagaimana perubahan revolusi tidak menjamin kestabilan kepada sebuah negara.

"Ketenteraman di sana masih belum pulih, ekonomi mereka hampir lumpuh, industri pelancongan terjejas dan kadar pengangguran semakin tinggi.

"Ini kerana mereka tidak boleh mengawal perubahan dengan keadaan teratur," katanya.

Najib memberitahu 12,000 belia yang hadir supaya tidak dipengaruhi oleh parti politik tertentu.

"Mereka mahu pilihan raya bebas dan adil. Kita juga inginkan perkara sama. Kita tidak mahu menang secara kotor. Kami mahu menang kerana mendapat sokongan rakyat.

"Perubahan tidak akan berlaku dengan mengadakan himpunan jalanan. Perubahan hanya akan berlaku jika pemimpin politik boleh membawa pembaharuan," katanya.

Najib turut menggesa golongan belia supaya membuat keputusan tepat ketika mengundi kerana jika tersilap langkah pada pilihan raya umum, tindakan itu akan membawa bencana kepada negara.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/6/9/mstar_berita/20120609135503&sec=mstar_berita